

REGLUGERÐ

um fyrirkomulag og framkvæmd samræmdra prófa í grunnskólum.

1. gr.

Reglugerð þessi gildir um samræmd próf í 4., 7. og 10. bekk grunnskóla.

Með slíku samræmdu prófi er í reglugerð þessari átt við sama próf sem heill árgangur þreytir á sama tíma og við sömu eða sambærilegar aðstæður.

Allir skyldunámsnemendur eru skyldir til að gangast undir samræmd próf njóti þeir ekki undanþágu samkvæmt 5. málsgrein 35. gr., 36. gr. og 48. gr. grunnskólalaga eða eru sannanlega forfallaðir vegna veikinda á prófdegi. Nemendur sem eiga að gangast undir samræmd lokapróf í 10. bekk en eru samkvæmt læknisvottorði, veikir á prófdegi, skulu þó þreyta sjúkrapróf sem skólunum skulu lögð til og menntamálaráðherra ákveður með auglýsingu hvenær fari fram.

2. gr.

Grunnskólum er skylt að halda samræmd próf og fylgja reglum um framkvæmd þeirra.

Menntamálaráðherra leggur grunnskólum til samræmd lokapróf í 10. bekk í a.m.k. fjórum námsgreinum svo og samræmd próf í kjarnagreinum í 4. og 7. bekk.

Auk samræmdra prófa samkvæmt 1. gr. skulu grunnskólar eiga kost á samræmdum könnunarprófum og stöðluðum kunnáttuprófum sem menntamálaráðuneytið lætur gera.

3. gr.

Samræmd lokapróf skulu haldin í 10. bekk í a.m.k. fjórum námsgreinum.

Tilgangur samræmdra lokaprófa í 10. bekk er að:

- athuga eftir því sem kostur er, hvort námsmarkmiðum aðalnámskrár í viðkomandi námsgrein hafi verið náð
- vera leiðbeining um inntöku nemenda á mismunandi námsbrautir framhaldsskóla
- veita nemendum og foreldrum/forráðamönnum þeirra upplýsingar um námsárangur og námsstöðu nemenda
- veita upplýsingar um hvernig skólar standa í þeim námsgreinum sem prófað er úr, miðað við aðra skóla landsins.

Menntamálaráðherra ákveður með auglýsingu með árs fyrirvara í hvaða námsgreinum í 10. bekk skuli prófað samræmt og hvenær próf verða haldin.

4. gr.

Samræmd próf í kjarnagreinum skulu lögð fyrir samtímis í öllum 4. bekkjum og öllum 7. bekkjum grunnskóla.

Tilgangur samræmdra prófa í kjarnagreinum í 4. og 7. bekk er að:

- athuga eftir því sem kostur er, hvort námsmarkmiðum aðalnámskrár í viðkomandi námsgrein eða námsþáttum hafi verið náð
- vera leiðbeinandi um áherslur í kennslu einstakra nemenda
- veita nemendum og foreldrum/forráðamönnum þeirra upplýsingar um námsárangur og námsstöðu nemenda

d. veita upplýsingar um hvernig skólar standa í þeim námsgreinum sem prófað er úr, miðað við aðra skóla landsins.

Menntamálaráðherra ákveður með auglýsingu hvenær samræmd próf í 4. og 7. bekk skuli haldin.

5. gr.

Menntamálaráðherra felur Rannsóknastofnun uppeldis- og menntamála eða öðrum aðila framkvæmd samræmdra prófa með sérstökum samningi og ber stofnunin/aðilinn ábyrgð á samningu og framkvæmd prófanna samkvæmt þessari reglugerð.

Í samningi þessum skal m.a. kveðið á um samningu, fyrirlögn og úrvinnslu samræmdra prófa.

Ekki er heimilt að ráða kennara til að semja samræmt próf ef hann kennir sömu námsgrein í viðkomandi bekk. Kennarar skulu ekki meta úrlausnir nemenda úr þeim skóla þar sem þeir stunda kennslu.

Trúnaðar- og þagnarskylda hvílir á þeim sem sjá um og taka þátt í að semja og meta úrlausnir á samræmdum prófum. Þeim er óheimilt að fjalla um eða birta að hluta eða í heild, úrlausnir einstakra nemenda.

6. gr.

Samræmd próf skulu vera markmiðsbundin eftir því sem aðalnámskrá gerir kleift. Jafnframt skulu þau vera áreiðanleg og réttmæt. Mat úrlausna á samræmdum prófum skal vera hlutlægt.

Í upphafi skólaárs tilkynnir sá aðili sem ber ábyrgð á framkvæmd samræmdra loka-prófa í 10. bekk skólum bréflaga um uppbyggingu þeirra prófa og um námsþætti sem prófað verður úr.

7. gr.

Heimilt er að veita þeim nemendum sem hafa annað móðurmál en íslensku undanþágu frá því að þreyta samræmt lokapróf í íslensku. Skal þá leggja fyrir sérstakt lokapróf í íslensku en nemandinn skal þreyta önnur samræmd próf.

8. gr.

Nemandi er hyggst ljúka öllu námi grunnskóla á skemmri tíma en 10 árum sbr. 3. málsgrein 35. gr. laga nr. 66/1995, skal þreyta samræmd lokapróf með nemendum 10. bekkjar enda telji skólastjóri og umsjónarkennari að hann geti lokið öllu námi grunnskóla með fullnægjandi árangri.

9. gr.

Við fyrirlögn samræmdra prófa ber að fara nákvæmlega eftir þeim fyrirmælum sem fylgja prófi. Frávik frá reglum um fyrirlögn eru ekki heimil nema með samþykki þess aðila sem ber ábyrgð á framkvæmd prófanna.

10. gr.

Heimilt er að víkja frá almennum reglum um fyrirlögn samræmdra lokaprófa þegar um er að ræða líkamlega fötlun, langvarandi veikindi eða aðra erfiðleika af líffræðilegum orsökum enda séu þessar aðstæður nemandans staðfestar af sérfræðingi á viðkomandi sviði.

Slíkar umsóknir um frávik frá reglum um fyrirlögn skal senda þeim aðila sem ber ábyrgð á framkvæmd samræmds prófs í síðasta lagi tveimur mánuðum fyrir próf. Umsóknir skulu undirritaðar af nemanda og foreldrum/forráðamönnum hans og staðfestar af skóla-stjóra.

11. gr.

Óheimilt er að veita öðrum en nemendum og foreldrum/forráðamönnum þeirra og framhaldsskóla, þar sem nemandi hefur sótt um skólavist, upplýsingar um einkunnir einstakra nemenda á samræmdum prófum nema nauðsyn beri til vegna:

- a. flutnings nemenda milli skóla
- b. athugana sem fræðslufirvöld standa fyrir
- c. fræðilegra rannsókna enda sé krafist fullrar þagnarskyldu og fengin heimild tölvu-nefndar.

Innan árs frá því niðurstöður samræmdra lokaprófa hafa verið sendar skólum samanber 12. gr., getur nemandi sem þreytti samræmt lokapróf krafist þess að fá úrlausn sína afhenta. Öðrum úrlausnum skal eytt á tryggilegan hátt að þeim tíma liðnum og er sá aðili er umsjón hefur með prófinu ábyrgur fyrir þeirri framkvæmd.

Um varðveislu upplýsinga sem unnar eru upp úr prófúrlausnum á samræmdu lokaprófi í grunnskóla fer eftir ákvæðum laga um Þjóðskjalasafn.

12. gr.

Eigi síðar en 24 dögum eftir síðasta samræmt lokapróf í 10. bekk skal sá aðili er annast framkvæmd prófanna senda skólastjórum niðurstöður þeirra í ábyrgðarpósti eða á annan tryggn hátt.

Í síðasta lagi mánuði eftir að samræmd próf í 4. og 7. bekk eru haldin sendir sá aðili sem annast framkvæmd prófanna, niðurstöður til skólastjóra. Auk einnar einkunnar fyrir hvert próf skal hver nemandi fá yfirlit yfir árangur sinn í einstökum þáttum prófsins. Framkvæmdaaðili skal jafnframt senda hverjum skóla heildaryfirlit yfir niðurstöður nemenda skólans eftir prófþáttum í hverju prófi, meðaleinkunn og meðaltöl á landsvísu eftir prófþáttum og prófgreinum.

Einkunnum á samræmdum prófum skulu fylgja upplýsingar um áreiðanleika þeirra.

13. gr.

Rannsóknastofnun uppeldis- og menntamála eða annar aðili sem falið er að sjá um framkvæmd samræmdra prófa, skal eigi síðar en þremur mánuðum eftir að próf eru haldin, gefa út yfirlit yfir heildarniðurstöður prófanna og dreifa til grunnskóla, foreldraráða við grunnskóla, framhaldsskóla og fræðslufirvalda. Þar skulu koma fram meðaltöl einstakra skóla eftir prófum, meðaltöl allra skóla og aðrar upplýsingar sem þarf til að skýra niðurstöðurnar og auðvelda túlkun á þeim.

Láta skal öðrum aðilum í té upplýsingar um niðurstöður samræmdra prófa ef þeir óska þess en ætíð skal gæta trúnaðar gagnvart einstökum nemendum.

14. gr.

Einkunnir á samræmdum prófum skulu gefnar í heilum og hálfum tölum á einkunna-kvarðanum 1-10.

15. gr.

Í skírteini sem nemendur fá þegar grunnskólanámi lýkur, skal skrá einkunnir á samræmdum lokaprófum ásamt vitnisburði í öllum þeim námsgreinum er nemandinn lagði stund á í 10. bekk. Hafi nemandi fengið undanþágu frá því að þreyta samræmt lokapróf, skal geta þess á prófskírteini hans.

Strax að lokinni útskrift úr grunnskóla skal skólastjóri senda menntamálaráðuneytinu afrit af útskriftarskírteinum allra nemenda skólans.

16. gr.

Menntamálaráðherra skipar skólum trúnaðarmenn til eftirlits og aðstoðar við framkvæmd samræmdra lokaprófa í 10. bekk. Trúnaðarmenn þessir eru fulltrúar menntamálaráðuneytisins á prófstað og skulu hafa eftirlit með því að próf fari fram samkvæmt þeim reglum sem settar eru um framkvæmd þeirra.

Menntamálaráðherra setur trúnaðarmönnum erindisbréf og greiðist kostnaður af störfum þeirra úr ríkissjóði.

17. gr.

Reglugerð þessi er sett samkvæmt 46. gr. laga nr. 66/1995 um grunnskóla og öðlast gildi 1. janúar 1997. Jafnframt fellur úr gildi reglugerð nr 65/1985 um námsmat í grunnskólum.

Menntamálaráðuneytinu, 20. september 1996.

Björn Bjarnason.

Guðríður Sigurðardóttir.

STARFSREGLUR

fyrir kærunefnd útboðsmála.

I. KAFLI

Almennt.

1. gr.

Fjármálaráðherra skipar kærunefnd útboðsmála. Nefndin skal skipuð þrem mönnum og jafnmörgum til vara. Skulu þeir hafa góða þekkingu á útboðum almennt, opinberum innkaupum og viðskiptum. Þeir skulu vera óháðir hagsmunum ríkisins og seljenda en um hæfi nefndarmanna til meðferðar einstakra mála fer að öðru leyti eftir reglum stjórnsýslulaga nr. 37/1993. Fjármálaráðherra setur nefndinni erindisbréf.

II. KAFLI

Hlutverk og starfssvið.

2. gr.

Hlutverk kærunefndar útboðsmála er að taka til meðferðar formlegar kærur, sem beint er til fjármálaráðuneytis vegna innkaupa ríkisins á vörum, þjónustu og framkvæmdum. Jafnframt er nefndinni ætlað að fjalla um kærur, er varða brot á reglum Evrópska efnahags-svæðisins, sbr. VI. kafla laga nr. 63/1970, um skipan opinberra framkvæmda og 14. gr. laga nr. 52/1987, um opinber innkaup.

Nefndin gerir formlegar tillögur til fjármálaráðuneytis um afgreiðslu þeirra mála, sem hún fær til meðferðar. Ráðuneytið tekur síðan endanlega ákvörðun í hverju máli um sig.

Nefndin getur tjáð sig um meinta bótaskyldu kaupanda og grundvöll skaðabóta, sbr. 27. gr. laga nr. 63/1970, um skipan opinberra framkvæmda, 14. gr. laga nr. 52/1987, um opinber innkaup og 20. gr. laga nr. 65/1993, um framkvæmd útboða, sé þess krafist, en hún fjallar ekki um fjárhæð skaðabóta.